

四庫全書薈要

• 乾隆御覽本

集部

欽定四庫全書薈要

集部

大憲集卷二十四

詳校舊候補通政司經歷臣郭祚職



文憲集卷二十四

明 宋濂 撰

墓版文

凡十章

故封承事郎給事中王府君墓版文



氏所出不一有姬姓者二族有媯姓子姓者各一族有虜姓者析四族餘未暇論述然姬姓二族皆出於周其一始於王子晉之子司徒宗恭其後則太原瑯琊為尤盛其一始於畢公高之子畢萬其後則京兆河間

為龍蕃二者皆以其王族故氏之於王云太原之族自秦漢以至於唐最多顯著與清河之崔隴西之李滎陽之鄭范陽之盧天下號為五姓載於史牒者班班可考也太原之裔有分居光之固始者自東晉南渡來遷泉之晉江溫陵里圖牒喪不知其為幾世至唐協律郎晉又自晉江遷黃陽之延興里協律生宋大理評事文郁大理生校書郎訥校書生大理評事保隆評事生莆田縣尉仁暉縣尉生睿睿生連連生額額生鄉貢進士贈

奉直大夫國光進士生給事中晞亮給事生長溪東尉
桂東尉生奉直大夫潤之奉直生禮部侍郎太沖禮部
生知南海縣事應麟知縣生元莆田縣典史子春則府
君父也母任氏府君諱公穀字德良生三年而典史君
亡及稍長問其母曰吾父何在母曰若父死已久墓木
今將拱矣府君擗踊號慟即製斬衰經帶追行三年喪
事兄最樂先生朝有如其父絲毫不違其教今先生時
號名儒以古文著聞亦盡心於府君鞠育導迪無不備

至羣族內外姻皆稱之府君肄業郡庠精勤越流輩夜將半鄰齋燈火盡滅府君獨焚膏挾冊兀坐如枯株自是能通一經發為大義亦整比可觀郡博士命題招弟子郡試於堂府君特居首列會歲當大比同舍生皆踊躍入家狀期赴鄉闈府君獨漠然若無聞或勸之府君泣曰予生髮未燥先公棄捐一念及茲肝膽為之析裂雖幸母夫人存鶴髮鬢髻而疾疢撓之恨不化一刻為一朝尚忍斯須離膝下乎杜門不出日以色養為事及

夫人卒塋祭一遵禮度哀號不暫舍性好施家雖單窶
聞人饑凍輒解衣減食濟之不然夜不得甘寢君子以
為賢元季政大亂七閩之豪挾兵威以擅生殺割土疆
往往致書交辟之府君度其無成皆峻辭已而亂愈亟
府君挈妻孥避地仙遊山中曳杖盤桓而烟霞泉石日
與之相親及皇朝御厯六合載清而府君則頽然老矣
乃謂其長子寅曰不仕無義吾非不知也第迫於親老
且病耳爾當力學淬行以繼其門寅遂以尚書中鄉貢

第九名上南宮未及會試擢為給事中尋兼靖江相府
錄事階承事郎朝廷推恩封府君承事郎給事中府君
之配陳氏先卒已十年至是亦贈孺人寅方攝監察御
史按劾山西忽官書至驛言府君已歿寅匍匐奔還南
京詣予哭曰寅罪逆深重禍延先子以洪武八年十月
三十日長逝壽僅五十又八寅將馳歸擇地縣南香山
里白石峯之原以九年某月日襄茲大事而起母孺人
之骨合葬焉惟先生閔

11

1/10/10

11

欽定四庫全書

卷二十四

故浦江義門第八世鄭府君墓版文

浦江義門其第八世主家政者曰鄭渭字伯陽宋龍游丞德珪之曾孫東塾處士文嗣之孫元贈中書禮部郎中鑑之子年七十二以洪武十年九月十九日終于家十一月二十四日塋於縣東三十里杉栢墓之原其子挺楠與其孫炯勲合辭請銘於太史氏濂濂乃為之銘曰

維伯陽父自幼穎發佐諸父齊家才超然自見也泉布

出納及米鹽細務一一鈎校使無所漏也更繇之繁身
獨任之戴星往來踰三十春秋不憚煩也辭意懇款壹
本諸誠無纖毫人偽也化行鄉邦三尺之童卒皆信服
呼之為長者也縣之大夫踵門問政告之以利病民陰
受其賜也方嶽重臣嘉其篤純欲辟為從事辭不為也
上繩祖武下儀孫曾循蹈規矩晝夜兢兢自惕也大田
以祭嚴若祖考之臨勒石示訓戒勿質鬻之也合巹十
世中更亂離左抗右禦卒使危復安也羣從同樂熙熙

然如春風和氣襲人見者革面也宅心忠厚不動聲氣
寧人加已誓不先人也國初定賦郡田一斛驟增其半
白於當路而蠲之也姻家析貲陳之以秉彛示以已之
親疎為厚薄人服其均且平也宗族有早孤者收而鞠
之歛其租入逮長而悉歸之也有盜持斧斤之林僮往
禦之反為盜所毆僮妻往護之失足墜塹死禁僮勿訟
反遺之槥櫨也職此之故聞其捐館一郡為之出涕貴
賤賢愚無間然也其妻吳裕字曰靜安能通詩書為一

家女師是以配君子也嗚呼世不逮古夫妻相虐而兄弟為仇比比皆然也有若伯陽父實中流之砥柱彞倫賴以扶樹名教賴以增重奈何去昭昭而就冥冥也青山不移流泉不竭而形容不可復覩苟可贖之當人百其身也嗚呼勒銘斯阡言有盡而情無窮過者讀之不為之涕泗沔瀾非仁人也

鄭彥宏甫墓版文

鄭彥宏甫諱鉅浦江人也其家十世聚居諸父平山府

君文泰才雄志銳並以義亢其族特善彥宏彥宏每侍左右操其權度以裁小大之政府君沒從兄青憊居士欽有才如府君曰恢弘之其宗愈亢茂亦惟彥宏是友蓋彥宏凝慤而夷沖其與物交範防至密諳練甚精而於羣從之間傾誠以相周旋故得其驩心其考文彝蚤世奉妣黃夫人盡孝及夫人亡出寢於外二年弗近酒肉哀慟無晝夜幾傷其生居亡何彥宏以次長其家確守成法如執玉捧盈唯恐有媿前人然所見一定雖羣

言沸騰終不可搖奪由是內外政皆治會遭兵難法無少爽性好施與天大雪有童子凍餓道路彥宏亟溫以酒且治纊衣之使養於家喜注善藥起人夜半有告惡者即應之亦無留難一日以事適鄰邑忽有拜馬前者彥宏曰吾不汝識今拜欲何為拜者曰吾家四三人病滯下欲死賴公藥乃生食公之德久不報幸一見不自知其賴之頓地也彥宏笑遣之彥宏壽六十七以某年月日卒卒後一月某日塋於左溪山西源娶周氏先十

八年卒生子男三演淵洧演天淵洧皆恂恂善繼而淵
通經藝以古文辭知名於時用薦者為月泉書院山長
女一歸江蓮孫男四楷榿榿檀榿天女三人皆在室彥
宏遇人煦煦有恩意追沒人思之弗置至今有淚落者
昔唐張公藝字知本劉君良皆以孝友聞史臣稱之以
謂此三人者孝行推於友睦而禮遜之風數世不衰皆
在元魏齊隋之際真所謂豪傑之士雖無文王猶興者
今較以彥宏之家君子咸言過之而彥宏諸行又跬步

不越於繩槩非傑然自立者能若是乎南陔白華商之
季世僅見之夫子刪詩特存其聲而弗削沉於後世者
乎濂與彥宏游凡三十年知之為至於是造文表諸墓
以風示人人庶幾有來取則者

故章府君墓版文

章府君姓也遇孫名也宗觀字也浦城西邨康州刺史
及自南安來遷也今居龍泉康州五世孫都官郎中重
再遷也又十一世至煥文三遷縣西之錦川也煥文生

斯立斯立生格皆潛耀巖穴而善利罩於鄉邦此府君
曾祖祖父也當唐之季遠祖仔鈞受唐命官至檢校太
傅西北面行營招討制置使勲名著於一時其妻越國
夫人練氏懿德陰暢能全建州一城生聚生子一十五
人其後多榮號登進士第者幾百人若郇國文簡公得
象以清忠致位台輔若實文閣待制衡以文辭卓冠多
士若忠恪公誼立朝論事務存大體若莊簡公察建功
涇原而夏童不敢東牧蓋章章者其他位法從典大藩

者項背相望此府君世澤也持身凝簡超然百為之外而毅肅之氣洽於倫類望之如太山中居莫不尊而仰之然耿介無阿私臨事定議則曰某為回邪某為謬誤凜凜不少貶此府君恒性也凝坐一榻自明至曛未嘗去衣冠發言必思踐未踐則終日苦思遑遑不少寧族姍比閭三尺童子來見必以禮接弗敢慢且諄諄然戒曰惇爾孝弟羽翼爾文學毋隕乃祖乃父聲聞以為爾家羞人稔其德事不得直亦上謁而求平焉從容諭之

輒中其肯綮誓勿煩有司早曠疫癘泣禱於上下神祇
不獲應不止此府君馴行也甲子三百六十有六府君
所享年也至正三年五月六日沒之年月日也窆之年
月若日則十四年二月十一日也縣之西寧鄉玉峯山
之陽墓之地也宋兵部架閣張公宏女府君配也曰珪
曰璋曰御史中丞濫子男子也妻縣人士陳師大者子
女子也曰存仁曰存質曰某元帥存道曰存誠曰存厚
曰存禮孫也件繫羣行而為之狀者青田劉先生基也

譔次其事而樹文於墓門者溢之同志友宋濂也銘曰
維章受氏出自東海曰齊之姜也奕葉蟬鳴施于北南
於燼其光也玉象降徵豐筭成陵爛然有章也府君承
之凝簡而昭淵慤以莊也左矩右繩周旋敦慎納於危
防也不詭而隨不肆而抑不龐而涼也含真葆熙脗合
至玄莫吐耀芒也何以婉之龍劍在褱神珠韞房也苟
宅所施物固非吉胡歛不張也有子繼志曰隱曰顯各
惟其常也棲心奧區三秀孕奇或發休祥也執法中司

白簡巖巖凜為飛霜也玉峯之阡冲和固結其氣靈長也太史勒銘鐫諸樂石百世而弗忘也

故愚庵先生方公墓版文

嗚呼自我齊國文公紹伊洛之正緒號為世適益行而彰傳道受業者幾徧大江之南而天台為極盛時則有潘子善氏林叔恭氏趙幾道氏兄弟以及杜仲良氏如此者不能徧舉皆見而知之推原體用之學敷化弘治而風動於四方重徽疊照於斯為至流風遺俗迄今猶有未泯若我愚

庵先生方公其殆聞而知之者歟先生諱克勤字去矜姓
氏其裔出睦州玄英處士于宋初十五世祖升四府君某
始遷寧海侯城里曾大父重桂鄉貢進士大父子野父炯
元鄞縣儒學教諭母葉氏宋丞相夢鼎從曾孫女也先生
幼而端凝五歲知讀書自辨章句十歲暗記五經諸老先
生嘖嘖愛賞目為神童年垂弱冠徧窮濂洛關閩遺書及
尋鄉先達授源委凡涉性命道德之秘窮研探索寢食為之
幾廢因喟然嘆曰為學必合天人而後可舍是非學也至正

甲辰嘗一踐場屋言國家利害峭直無所顧忌有司不敢取飄然東歸益閉戶潛心於一卦一爻必欲驗諸事為至於天文地形禮樂刑政及制度名物之屬亦辨析歸於至當如指諸掌海民為變江浙行中書檄吳江同知金剛奴募民為水兵先生詣金剛奴謂曰民計窮而為盜未為盜者亦挺挺欲動奈何授以兵是謂增盜非禦盜也金剛奴怒不答既而水兵果於中道殺護吏逃去從盜金剛奴踰垣走折一足始悔曰吾不從方先生言以至於此

未幾侍御史左答納失里至郡招諭劉都事基為之副
先生上書陳勦殄之畧不宜姑息都事聽其言而不能
用遂致郡縣陷沒民惟塗炭先生發憤入山谷採松栢
食之累日不返當路延先生入幕府先生謝曰我辟穀
久矣弗足與人間事也吳元年冬大明兵取台州先生
欣逢真主之出乃大有為之時疏舉賢才安人心黜豪
強除暴斂明教育十餘事將上之未果洪武二年詔立
郡縣學以訓導辟先生樂於育才即起應命負笈來從

者至百餘人先生據經陳義曲暢旁通幾無毫髮遺憾
聞者皆淪肌浹髓薰為善良俄以母夫人春秋高力辭
而歸諸生追之者踵相接學舍為空四年夏朝廷聞先
生賢欲致之部使者袁君宏以書幣來徵先生以母老
不忍離左右辟去旁縣郡承使者風旨雜逮姍連督索
之先生上京師兩詣執政固辭執政竒先生材命就銓
曹試考覈入格名列第二上特命知濟寧府事階朝列
大夫錫之冠帶以行先生至官為書一通懸於康衢諭

上愛養元元之意民有所不平詣府自言禁吏胥不得
呵問日引耆舊坐語參以得失郡學官缺孔子廟堂頽
圯聘前進士為師弟子員有未備者選補之役浮屠以
葺廟堂廟南鑿為泮池傍列兩序闢射圃於廟北造弓
矢樹正鵠日一再視學親為正句讀較中否屬縣之內
社各立學學凡數百區學子繫籍者二千人兵後號為
最盛始有詔民闢廢田者閱三載乃稅吏徼近功不俟
期歛之復以田定起科繇民益惰田不增闢先生與民

約定為簡書列為丁產為上中下三等復折為三每
有徵發恒視書為則吏不敢並緣為姦歲且暮轉關衣
於燕時有令役民舟者有誅別郡以牛車從事天雨雪
牛僵死於道破產者十八九民請以舟就役僚佐畏令
難之先生曰吾知從民便抵法非所辭也即載以舟具
白山東行中書省省義不問郡倉絕糧省檄民七百里
關

禱皆有年五年秋隣境盡蝗先生省愆變食稽首告天
夜聞空中薨薨聲燭之乃飛蝗蔽天而是郡獨有年民
有赴愬者隨事則決大者笞辱小者諭遣之不留案牘
尤慎於庶獄月錄日省不使久淹或文有未具時作糜徧
食之夏秋之稅每命斛卒持槩高下出其手或至累旬
不收民兢指倉為宰先生令民自槩斛卒斂手不敢出
氣遇將西成預移文與民期民爭來輸不遣一吏而稅
常先登江西浙西二行省運糧百萬濟寧水陸數千里

先生視如部民不使有錙銖怨對舊比每斛益四升以裨蠹耗先生憫其道遠言於朝蠲之府召州縣官屬皆役皂隸往往索賂無厭先生下信符置郵無敢不至者信符之籍以印識而中分之吏托月日稽違以媒利先生私藏之緩急有程一自己出復施其法於封內壹以信符召民民得竟并力耕桑襁負來歸者相望於道初赴官時戶僅三萬稅萬餘石三年之後稅以石計者十四萬四千七百戶亦增至六萬有奇二州二十縣家有

積粟野無餓草羊牛鷄犬散被郊坰富庶充實如承平
之世至於社稷山川諸祀先生修宗壇壝嚴飭器服或
樹名木於周垣之外一如儀制無有所闕水驛在西門
內庫陋污濕居者弗寧先生料棟材木候農之隙更作
於城南庭堂室房弘敞逾昔冬寒河凍驛舟不行令舟
人伐木為炭穿土穴藏水因其餘力以成事功泗水經
郡城南通淮江北引河濟地勢高瀉構石為牖而時畜
洩之魯橋棗林二牖歷歲久壞石填河中舟道難之役

牖丁絙壞石治灰而甃之故以葦困庾糧火屢為災教
民為陶瓦營屋百餘間申戒火令編民居為曹伍遞相
救恤其患遂止大將軍魏國徐公達副將軍曹國李公
文忠統士馬十萬之燕駐郡稍久要官勢吏爭索糧芻
相膠葛於前先生依序酬決無不如意一軍稱能永嘉
侯朱公亮祖將舟師數百艘北征河水涸舟膠不可動
脅先生曰即趣五千夫浚河否則以軍法論日且暮先
生不忍煩民泣禱於天夜二鼓天雨黎明水起數尺舟

竟去莫有言者先生為政以風化為急務以德勝佐貳
始倨慢先生委誠待之卒自愧服武夫悍將不知禮久
亦化戢在官縱無事終日冠衣坐堂上召諸吏授以書
詩法律或公牘堆几羣辨方譁先生片言折之各心悅
而去性不喜近名常自誦曰近名必立威立威必至害
人吾不忍為也府庭之間不陳桎械革鞭懸楦間示不
妄罰省憲考績為六府最八年春入朝皇上以為善治
民錫燕儀曹使踐其舊職瀕行獎諭有加且曰政成當

顯用卿秋八月知曹縣事程貢嘗以不職被笞心銜之上封事言狀詔御史楊某廉按楊通程故人恐程坐誣罪易民服潛索先生過事踰兩月無所得乃捕府中卒吏盡繫之榜掠無完膚無一可問者楊更與其吏謀誣先生用倉中灰葦時十月固未嘗附火而葦則苫公宇垣實無私用者先生不與辯遂就逮民號呼填道隨行百餘里者將千數先生次子孝孺上書政府大臣願以身為軍贖父罪不報竟謫役江浦會空印事起吏又誣

及之孝孺復草疏將伏闕上訴而先生歿於京師九年
冬十月二十四日也壽僅五十又一孝孺與兄孝聞奉
柩東歸十年春二月二十四日窆於縣東北深灣章施
山之原禮也先生娶林氏諱姬婦道為一族冠先十五
年卒至是合塋生子二人即孝聞孝孺孝聞年十三居
母之喪不肉食至服除人以純孝稱之女一人再娶王
氏諱在生女一人未彌月而王卒少房董氏育之董氏
生子一人曰孝友二女皆在室未行先生面白如玉鬚

眉秀整不妄笑語動容周旋必合禮法兵亂負母逃入
深谷兩踵血流遇二弟訓育備至終身未嘗失色與人
交率真任質不事表暴不以久近為冷熱立談之頃洞
見肝膈南冠過郡者必以米醪饋之不能步者僦舟車
送之萊蕪承陳川欲迎母為養厄於無貲出錢五千助
之同列以事奪祿賈布帛給其用且日延之對食久而
不衰脫逢其飲醉投案大諾而去待之益恭及酒解來
謝陽若不知者曰昔之夜吾亦醉矣不識君何謝也生

平奉養簡素不服紈綺御一布袍數年載不易日不再
肉不治官事輒却肉不食所守廉甚絲毫不取諸人每
行縣以物自隨杯湯不肯受兗州守因童進二木瓜笞
童十召州吏還之鄉人有為饒陽令者以燭雁侑書力
却去乃已初至官時祿米一斛可易金三兩以軍食告
乏月取十斗為食餘悉儲於倉或尤其迂不恤也晚年
益加畏慎晝所為之事夜則白於天俯仰皆無愧怍榮
辱利害恒視之若一坦然不疑古所謂體道成德之人

先生誠庶幾焉其為文章質而不華平而中理有汗漫
集若干卷傳學者云濂私自念齊國文公之薨始一百
七十又九年而其學寢微希世取寵者徒剽掠為談辨
誇多鬪靡者務組織為篇章文公所以扶世教淑人心
者率棄為空言故其臨事之際仰攬俯拾唯恐利不入
索至有庸夫賤豎之不屑為者嗚呼可嘆也已有如先
生聞風而興乃能誠求實踐參前倚衡儼若上帝鑒臨
涵養既純發舒自異仁民善俗之政至今人人能道之

夫命雖止於斯而其率性會道無愧於文公者尚皦然弗誣也孝孺久從濂受經頗知先生行事之詳於是歷敘其故而繫之以銘銘曰

堂堂齊公命世之雄伊洛正傳實為大宗入天出人完傳翼經有遏必䟽無幽不明疇不鼓篋千里來過燦如聚星惟台獨多流光所及寧有翳昏揭彼日月輝於天門逝者汙汙滅景銷聲不有人豪聞風孰興猗歟先生行知尊聞養氣弗餒充乾塞坤實孚名隨上徹九天鶴

書翩翩降於丘園爰自布韋專城以居象笏朱衣於赫
其儀寵恩之加其廣無垠曷以報之誓不顧身敷宣帝
仁達於齊氓以煦以嫗以致其亨民或勞只如魴之頽
乃平更繇俾遂其生黠胥舞文其貪若狼乃障乃防而
扼其亢人相告言久嬰亂離父母孔邇我胡弗歸十百
為羣其來如雲操厥耰鋤以播以耘我行其原萬桑沃
然俯瞰於隰黍苗芊眠鄰多孽蝗刺天而飛避不入境
絕類有知真儒之效小試則殷誰曰漢吏專美其循太

蘇薰蒸郁紛囿自此而升何澤弗臻大命止斯傷如
之何視天方高淚如懸河我文侯嘆數奇則然中心無
慊生順死安善人殄瘁斯道之衰顧瞻無依胡寧不哀
崔崔者岡渺渺者陂其中有墳千載之悲

故一鄉善士張府君墓版文

浦陽江之上有大姓曰張府君天錫字君與懿然篤厚
人也自成童時輒知孝敬日趨大父母父母側問衣煥
寒而進退之年既長益推錫類之仁九族有弗振者時

卹其匱乏復懼族遠情踈築堂南山麓為序拜旅飲之
所長幼之節粲然不紊其於惇愛廣順之道有所賴焉
然不以是為足寒食十月朔汎掃先世諸塋必歷告嗣
人曰此為某府君其名行若何支系若何本末如連珠
已而泣曰吾髮種種矣苟不言爾等當不知土中為何
人慎識之勿使牛羊踐履其上平居正襟危坐終日不
妄動即動足跡亦有恒度撫世酬物一以誠有犯之者
任其輾轉兩耳如無聞尤不喜以疾言厲色加人人愈

愛慕之雖僮媵亦從化俯首趨功驩欣如也及歿不問
賢不肖皆歎惋悼惜有至淚下者至今語及府君猶舉
手加額稱之曰長者長者云府君之裔初自清河遷已
厯十有二世曾大父維大父夢龍湖之儒學正父一寧
妣方氏府君生於某年月日歿於某年月日壽若干以
某年月日塋於縣西通化鄉施禮山原配室朱氏婦道
克修前卒竟合塋焉子三坦泰祐女三石某朱某樓鉄
其壻也孫五瑤福驥某某曾孫五某某昔漢之萬石君

家以孝謹聞於郡國雖齊魯諸儒質行咸自以為不及
若府君為人實有石氏之風奈何士習不古文有餘而
行不逮尚有愧於齊魯諸儒又何敢望君之藩垣哉是
可嘆已坦等遣從孫太常丞丁徵濂勒銘墓門濂聞至
正初宗藩賢王有奇府君才者辟為營田總管府治中
府君辭不赴今故不以為稱而題之曰一鄉善士張府
君墓并感其事而銘之銘曰

生之溫守之仁發之淳行之新以飭其身以伉其門以

壽其子孫

上海夏君新壙銘

國朝有天下患吏之病細民公卿廷議以為吏它郡人
與民情不孚又多蔽於黠胥宿豪民受其病固無恠莫
若立巨室之見信於民者為長使主細民土田之稅而
轉輸於官於是以巨室為糧長大者督糧萬石小者數
千石制定而弊復生以法繩之卒莫能禁是時惟蘇之
沈氏以奉法稱天子親召與語賜之酒食時減免其田

賦名聞四方而上海有夏君者尤畏謹好禮繇賦皆先時而集不煩徵索愛恤細民銖兩無所妄取民咸悅而德之聯事者皆以為則其所為蓋無愧沈氏而名未若沈氏之顯者聞於上則勢隆而易彰鬱於下則雖善而莫著此余因夏氏之請而欲揚之者也君諱宗顯字叔明自其曾祖參祖駟父祥皆居華亭君年十五六喪母以達禮聞服終請於父出從傳朱學數年學有名遊上海樂其土俗遂之長人鄉置田宅徙家以居既而家日

殷富益敦行義兄及孀姊老而窶歲時奉粟帛養之塋
其喪而卹其子撫異母弟有恩事外舅姑盡子婿禮聘
名士為師故人子就學者飲食之旦則冠帶坐堂上子
孫盛服入揖立兩序俯首聽教命君各授以事會食遣
去至夕取古今事可為法戒者辨析講說勉以為善子
孫恭謹愿慙不敢嬉遨譁縱凶歲鄉里皆從君乞粟帛
藥餌嫁娶喪災者取資焉故巨室之以長厚稱者必曰
夏氏見君者慕其善與君遊者服其才聞君卒者莫不

痛惜之也初君年未四十即穿墳為塚於舍西北若干步及年六十有六而卒遂葬焉君之卒以洪武十二年正月二十一日葬以二月九日娶王氏二男曰應炎應霖三女長適趙志學次適趙以仁一在室孫男三人翟彪麟女三人曾孫男一曰縣縣銘曰

周法既壞經界隳羣氓相啖鼠與狸吏庸俗澆邈不知赤子顛踣吁可悲聖神造謨立治規俾大有小勢相維孰囂戾法肆攘欺利猶在吻身已離惟吳夏君懲衆非

畏慎奉上仁以綏凶歲發廩賙困饑帛寒藥疾棺載尸
居家孝友此其推子姓愿謹習禮儀鄉閭愛戴莫敢違
為富好仁曷能追天錫爾膺當蕃滋嗟哉巨室宜相師
欲考令德徵銘詩

樓母婁氏墓版文

義烏樓璉詣余禁林且哭且拜曰璉也不才幸獲廁名
銓曹擢主大同宣寧縣簿歸與母夫人別夫人慘然若
不能勝情整璉衣出門涕淚闌干被頰璉恐傷夫人之

意忍泣而往之官僅五月而訃音至矣蒲伏歸伏草土
今服既闋吏部用常例別調行有日痛念先母遺德未
白舊幸灑掃門庭執弟子之禮敢以墓版文為累按璉
自為狀諱慶字靜嘉妻氏考某妣某氏夫人年二十歸
同里樓君光亨婦道修飭甚其姑童氏御家屬以嚴纖
芥有失輒鬱鬱不樂家介間鮮有獲其驩心者唯夫人
能之處先後唯以柔勝有恃強壓之者夫人俛首避去
久之咸愧赧夫人亦自如樓君隱居教授川里多宗之

每懸燈覽書直至鷄號夫人侍左右不敢先寢困睫或不可擘必奮迅自力習以為常嘉朋至脩物以饗雖截髮弗暇計其遇族姍不為翕翕而趨不為淹淹而舍始終有恒學者多不及也一旦病痰厥喉吻上下隆隆作聲已而蘇明日復卒壽七十八其時則洪武辛亥九月十七日又明年癸丑某月日藏於竹山里先塋之次子男子四玿璵珍璉璉以明經試吏部入官今為成都府仁壽縣主簿階將仕佐郎子女子三環瑜珥俞盛方錫

吳祐其壻也孫男三致中致和致剛孫女四貞娟婉媛
皆幼世恒謂陰教不行天下無良婦有若婁氏豈非婦
之良者耶奈何輕言之讀予銘者尚有所厲也銘曰
無非無儀維婦之常不有以昭之孰知其良余銘婁氏
之藏百世之下通有耿光

瑞安吳門三貞母墓版文

溫之吳荃不遠千里踏赤日而衝黃埃謁予於浦陽江
上既入容貌慘沮弗悅問其故輒嗚咽流泣而後言曰

荃之先世初家鄱陽再遷會稽唐諫議大夫畦又自會稽徙溫之瑞安世有宦蹟至宋兵部侍郎洸某州教授淪兄弟連擢某年進士第聲聞益著兵部幾世孫連江主簿朝宗無嗣以兄通判汀州泰來仲子諱埏君為之後君元柳州教授荃之曾大父也種學織文名播於邇遐其配金部郎中張公聲道之孫諱淑真柔婉靜專奉尊章能盡其禮曾大父方四十一不幸蚤世張夫人少九齡誓冰雪自潔卵翼其子至於有成壽七十二以至

正元年辛巳八月辛酉卒五年乙酉二月癸未塋州之
廣化鄉其子諱欽荃之大父也娶胡夫人諱節宋瓊州
安撫使尚賢之孫大父學行如其先人念家世之多艱
奮然欲有為寤寐不忘生一子諱璟荃之父也嗜學如
嗜利固有怠心及其冠也擇松江府判官林公天麟之
孫諱廉為之室林夫人瀕行父以上腴田三十畝畀之
林夫人曰兒聞女子之行父母有命戒之言不聞其他
也敢辭暨去動靜具合節文三族翕然稱其賢荃父始

二十一歲不幸又以疾不起時林夫人多二齡荃在遺腹中甫九月荃父臨卒語林夫人曰吾家宗祀不絕如縷者在吾一身今病革若是奈之何哉然吾祖父無涼德生男或可期爾能保嬰惇而養吾二親吾死為不死矣林夫人仰天泣曰所不如君言者有如日言終而卒卒一月而荃生生一月而大父繼卒大父年方四十而胡夫人少一齡二孀母相依為命拭淚治事晝夜更抱持荃嘗指曰吳氏三世惟賴此一孫耳嗚嗚對泣不能仰

視逮荃六歲天下繹騷大俠聚兵陰竊生殺之權者甚衆慕吾母豐於財爭欲聘之不聽更以危言震撼復不聽因說之曰當此亂世有力如虎者尚朝不謀夕以孱弱之婦不翅一輕塵乃欲保三尺孤耶知者頗竊笑於後矣為汝之計莫若托身執家而心存吳氏顧不足陰持之耶林夫人剪髮長號曰吾聞烈婦不再嫁此義或非禽犢不若也吾但知不負其天遺孤之保與否則天也吾言止斯苟或迫之有死而已其說既不行遂謀勒

兵而強委禽焉林夫人聞之與姑言曰事急矣不可以
不去即挾荃夜走平陽冒險阻履荆棘茹苦如茹甘吳
故大家儻人媵女滿庭願指得如意至是皆散盡林夫
人躬操杵臼以執爨事食或不充攻絲枲以貿易之然
猶市書教荃從名人游脫簪珥以代束脩且曰家雖廢
學不可廢也事姑尤孝謹姑多疾畢志竭慮以事巫醫
忽夢神人謂之曰魚鱉飼之即差已而果然人以為孝
感州大夫朱文憲賢之欲請於朝旌表其門閭林夫人

固辭乃止林夫人居平陽十二春秋當至正二十二年壬寅十二月己丑林夫人不幸歿壽三十九胡夫人哭之慟曰上天罰我如是之酷耶老者存而少者先逝耶荃時二十三矣胡夫人由是日夜程督愈勤惟恐荃之怠也又七年為洪武元年戊申荃始還瑞安故廬以十二月庚辰葬林夫人與吾父同穴又二年胡夫人亦卒實三年庚戌九月辛亥也壽七十三葬以五年壬子二月甲申其穴亦與大父同厝葬之地皆祔張夫人云惟我

吳氏寡祐禍及三世幾致隕厥宗其克底於今者三貞
母是賴前延後引靡遺餘力志節之著堅如金玉而不
變屹如丘山而不移稽諸古史傳所載殆不是過不肖孤
惻然在疚深懼不能負荷而先德之卓絕者又不白於
世一念及茲涕泗沆瀾而不自知敢以墓文為請惟先
生界矜之言訖拭涕再拜瀟因譬曉之曰荃無以憂為
也一誦一伸天道之常荃之家其困瘁極矣涵蓄之久
惡知不大發於後耶括人有林氏者當宋之訖錄家廢

於兵婦姑挾三歲兒奔走戎馬間幸而得全二母鞠之
成兒擢高科而其子孫文墨彬彬多列膺仕其事與荃
諸母頗類而酸辛則過之譬如木馬收閉華津於嚴寒
之日暢達光榮於和煦之時理則然也頗聞荃汲汲好
修而能古文辭薦紳先生咸器重之爵祿之至孰能禦
之哉荃又有二子昆昱矣其循系之滋亦將自斯焜煌
朗烈上繼兵部公之步武似不難致也荃無以憂為也
瀛故為白其三母之行樹石墓門以志子孫他時榮顯

之所自後之讀者當以瀛為知微之士云銘曰

海東名區有氏曰吳世為簪纓起家則儒仁漸義摩上
浹下孚陰教有翼大義鑑如卓哉三母貞德弗渝一延
於前脩涉艱虞誓竭肝膽以樹門閭二引其後丁時毒
痛同扼猛兇以保孤雛正如鼎足損一則欹代有懿哲
庶亡玷危荼蓼雖操冰雪自持中心所涵其氣吐霓白
石可泐我志弗移黃金可銷我節肯隨卒紹三世免隊
一絲粵稽於天厥理匪誣碩果不食其發必腴脩榦入

雲濃陰鬱敷欲構明堂疇忍含諸誰家鬼妻斬麻為衰
夫骨未寒背而他之君子疾視何翅蟲蛆有人心者請
觀銘詩

表
凡八章

先大父府君神道表

惟我大父府君卒於重紀至元丁丑十二月己卯後四
年當至正辛巳十月壬申塋於金華縣東七十里東烏
之山又六年丁亥十一月己未而大母夫人繼卒是年

十二月丙申合塋府君之穴又十二年介孫濂始自譔
文勒諸墓上不孝之戾其將何逃然自兵興以來潛伏
草莽支綴餘息不敢使墜其宗及夫驚悸稍定欲求鴻
儒駿生以論譔先德而故老凋落盡矣斯固區區不能
自力之過亦遭時孔艱心與事背無以遂其犬馬之私
失今弗圖恐終無以示子孫輒忘其固陋而一言之初
府君生於宋季宋未亡而官政先亂諸惡少年緝紙為
鎧剪荼為櫟斬牲以祭社神唯務相屠劉眊眊之怨即

蟻附蠶聚求饜其欲而後止府君亦多怨家能以智馭之獨能脫既及江南入國朝法制未定州縣吏舞文以鹽民府君因毀其家與夫人棲遲小室室中僅容榻案夫人設竈於戶外朝携釜出炊暮復持入御紡磚直至四鼓目稍瞑即起敲冰為盥嗽又復從事由是家用頗紓大德丁未歲惡人相食府君出糴於杭亡賴男子結為隊伍夜半推人門稱相公殺戮鹵掠呼號相聞里中惴惴不自保時嚴君侍夫人之側夫人與定計以物給

羣盜私走告捕賊掾部里兵襲之盡殲其衆府君聞其事自杭馳還見夫人悲喜交集且曰吾意爾母子作魚肉矣尚在邪已而傳酒相慰慶鄉鄰咸頓首謝曰微君家吾屬入鬼錄久矣府君性忠信啟口露肝膽不肯作世俗軟媚無實語與人交無二諾友愛尤篤與兄共執里役州家或有科繇至挺身獨任之曰毋以煩諸兄也府君年五十以家傳於諸子晴檐獨坐拄頰看山世間升沉榮辱了若不相關又二十八年乃終黃文獻公為表

其墓曰吉士云夫人粹然如玉而廉隅不可犯婦道母儀可為女中師傅行事暗合古烈女者甚衆齊家壹以禮法雖細微事皆遵矩度入其庭上下祇肅無敢大聲疾呼者歲時出坐堂上羣子姓捧觴上壽夫人厯以畏天為戒復證以近事曰某也善孫子繩繩多某也不善人已犁其庭矣從子有早孤者宗人利其貲多欲潛害之夫人與府君邵翼至成人為之納室而返其貲半髮不私夫人端明而有容其謙損不足之色津津見眉宇

間卒享耆壽以終其年視府君又加七焉瀛之生也與
府君同月日府君特憐愛之四五歲時府君坐置膝上
以手循其髮而祝曰吾祖實寬厚長者生平好施與不
求人知吾父孝弟如古人應物務以柔勝亦以恤貧之
故致家之索及吾唯先訓是式每衡於心而勿敢忘承
吾之利者列于前紛紛也今耄矣恐旦暮死不能有以
詔汝汝固幼幸聽吾言即聽吾言期樹善於無窮言訖
潛然而泣瀛時雖無所識知頗能記府君之言嗚呼府

君之為人其心厚於仁者乎濂也不敏學不加脩不能
使府君之名光輝震耀於來世兢兢惕惕若履淵冰所
幸祇奉誨言立身行己頗無愧怍於人庶幾弗悖於府
君之教者唐李翱為皇祖實錄有云先祖有美而不知
不明也知而不傳不仁也府君之美濂既知之矣雖不
能工為文辭不可緣是以自陷於不仁之域於是以特
牲告於神道列府君之言行而附見夫人之事貽諸孫
子使繼夫為善之志厯百世而毋怠云府君諱守富字

德政姓宋氏金華潛溪人父諱溥德母周氏夫人姓金氏諱妙圓父諱溥榮母謝氏生四男一女十三孫其世系之詳已見於翰林學士承旨歐陽公所述刻諸石矣不書懼瀆也前史官介孫瀛自製

石刻載府君世系今錄於左其文曰宋氏世居京兆唐大理丞憲武德間遷吳興憲字秉彝為易講師弟子數千人生有嚴有嚴生邠邠生綏綏生元熊元熊生忻忻生羸羸生殘殘生宗捷宗捷生服服生僕僕生循

循生伯旒伯旒生榮周廣順中遷義烏覆金山榮字
體仁通尚書春秋私謚文通先生生甫宋雍熙末遷
根溪之宋村甫字師杜生訓訓生帳帳生祥祥以弟
海子阜後阜生侶從榮至侶七世皆為鉅儒侶生永
敷栢嘉定初同遷金華潛溪栢字秉操以兄永敷子
溥德後溥德子即府君諱守富字德政履仁蹈義類
古篤行者妻金妙圓賢甚一言一行可為女中師法
生文昭文囿文馨文隆文昭一名朝字文霆有隱德

朝廷賜號曰蓉峰處士生淵濂淵義烏醫學教諭濂
博極羣書自布衣召入史館為編修官著孝經周禮
傳龍門子數十萬言元至正中遷浦江孝門橋上文
園生澄渭沁涪澤潤文馨生溱汶瀛文隆生瀟淵生
瑛濂生瓚璲澄生琦璫溱生理沁生珠瓊瑗瑛生性
怡瓚生慎愷恂澄瑛瓚璲皆儒噫府君誠吉士哉何
其孫子之賢且多也史官歐陽玄述

先府君蓉峯處士阡表

嗚呼惟我顯考府君之歿既窆白石山阡與顯妣夫人
同穴於是距顯妣卒且塋時已二十春秋顯妣壺儀幸
見諸登述而顯考之隧有石無辭輒泣而書之曰顯考
之生也宋方內附官府新建黥胥騁奸家道因之陵遲
鹽醢至有所不繼祖妣夫人與顯考鞠躬盡瘁誓勿蹶
其門祖妣營度於其內顯考則隨物順成應之於外歲
增月衍頗有成緒祖考府君崇高節不肯屈人下鼠輩
或加侵暴顯考於左右之使得以懲其非已而繇役繁

興州使臨門急於星火顯考每躡屨而往雖暴露於外
櫛風沐雨戒勿使二親知或憫其勞顯考曰在外亦差
樂耳不知勞也歲丁未大侵民散為盜夜持刃入人舍
貨錢羊牛聽其所攘稍不從即見殺顯考時役官中用
計安盜私聞於公府集社兵禽戮之鄉人德焉雖在事
為叢沓中雅志書詩見濂頗知學驩然曰予家自文通
先生以來世多巨儒深懼詩禮之澤或絕以為君子羞
心慙焉弗寧雖夢寐弗忘之汝宜從名人游毋殞厥宗

人恒市腴田構華居以遺子孫魯不旋踵隳廢不存者
有之予不能也其自號有知者則令遠附權貴人之門
藉威靈以徼榮寵雖稍與仕籍而貪墨弗之戒至身辱
家覆者有之吾又不能

關

嗟異焉嗚呼顯考稟質粹沖凡所謀為自然中乎繩尺
孜孜以好善為務遇有戕賊人者則為之感額良久嘆曰
人形而豺虎行魯不自省邪故上下咸以為有鄒魯上
賢之至行人無異詞如濂不肖雖戰兢自守無所愧怍

於人尚恨不足敬承明戒克紹先猷年踰五十猶持無用空文出應時須渙忍汨沒而實德且病矣每一念之顏面發頰不能自己因據拾顯考言行以表諸阡以志瀟之自咎以告後世子孫知所取法焉

滁陽蔡氏道山阡表

祠部主事蔡秉燾詣瀟請曰燾之曾大父諱某姓蔡氏初居趙州因官於滁遂家焉娶胡氏無子唯有一女懼蔡氏之不血食也乃命季氏子冬後冬負氣自豪殺人

亡命竟不知所終遂以女歸來安之許氏許氏諱清字士廉讀書有賢行平居寡言以儉德自將曾大父愛之曰是類我者也命以為子不聽久之乃相從實彞之大父也不幸為高氏子誣搆以死罪留圜扉者二年貲產咸廢而大父無愠容大父復無子亦生一女先是句容龍潭人孔氏有諱善者字國寶幼失怙恃唯二兄存願雪之依仲父以生一旦告仲父曰兄若弟一氣所鍾也苟戀區區貲業使兄被不義之名人其謂我何請避之

仲父為之汎濶出涕且曰吾在子勿憂於是竟決去無
留意行至滁大父見之嘉其知彞倫之理與其語又輕
財仗義有特達丈夫志亦以女妙靜妻之剗羊豕大饗
婣朋焚香祝天曰吾再世無嗣蔡氏之傳將遂微矣是
子其克荷負吾家乎乃後之實彞之父也不數年盡復
大父所喪土田人有曲行面直之鄉黨稱其賢生四子
長即彞次立童次壽童次慶真及一女至正甲午三月
二十九日滁陷於兵先母與女素英抱節赴水死立童

慶真皆不知所往獨先人與彛間關渡大江而居金陵
先人因憂憤成疾死時八月十八日也彛娶王氏生一
子名繼宗嘗念三世皆以異姓為後雖於先王之禮有
所未合原其情之所至豈得已哉彛家素積善天必福
之異子孫或衆多各俾一人承蔡許之祀而彛復姓孔
氏則於禮為得矣然大父之年僅五十七大母復少四
歲而終父視大母之年又少十歲母之年則如其父焉
四喪皆於黃道山以昭穆序塋山在州東北十五里曾

大父兆域之所在也墓石皆無文願子為通書諸碑以示後人天地開闢厥初生民何嘗知有所謂姓氏聖人者出惡其無貴賤親疎少長之別也於是因生賜姓胙土命氏以至於以字以謚以官以邑而族系漸繁矣蔡本姬姓許本姜姓皆以國氏者也孔本子姓以王父字為氏者也而三者何可同乎雖然凡有姓氏莫非神明之胄而出於炎黃之世所謂二十五宗一十四姓者尤多流雖殊而源則一遽謂之不同亦未見其為可也然

彞之為孔氏固為不刊之論彼二氏者豈可忘其所付訖而為若教氏之鬼哉誠令子若孫繼之一如彞所言亦出於禮之變耳嗚呼氏族之不傳其淆亂無別亦難明矣使彞不自言數世之後惡知有所謂孔氏者哉昔人有云人有姓氏猶衣服之有冠冕裂冠毀冕雖有帶裳幅舄不足以被飾其身其任不為不重矣其任為甚重人反視以為輕有如彞者豈非有識之君子乎某與彞交既久若異姓昆弟然故因其請為表著先塋之碑

使後世有考焉彛字秉彛為人慷慨疏通其從政也難
集之事談笑而成之人號為長才幼鞠同里王時中家
遂婿焉已而襲其姓時中既有後今請於朝仍氏於蔡
云

故天台朱府君霞塢阡表

孝子之於親曷嘗有紀極哉唯恐其嘉謨懿行不暴白
於後世也件繫羣事既有狀矣足以昭於人人又有玄
堂之銘銘比狀著矣又有阡上之表焉蓋辭之重複者

事必著甚哉孝子之心其有所慎乎仙居朱府君之卒
多厯年所其子公立既請縣大夫前進士魏俊民為之
銘其二孫木槩猶以為未足復來徵予文表於墓門揆
於古義合矣予乃按狀而書之曰府君諱嗣壽字得仁
姓朱氏世居台之臨海宋殿中侍御史希述其遠祖也
殿中君六世祖友直仕為宣撫司某官始遷仙居之東
門至府君又六世矣府君之生岐嶷而深沉豐厚而敏
慧自為童子時風岼孤鶩昂然野鶴之在鷄羣見者莫

不異之及游鄉校嚙齋羣經食芳而漱腴充然若有所得且曰古者為學精神心術一寓之於事為或慮其有不正也必資體驗擴充之功所以皓首窮經不敢輕寘之若拈華摘豔鉢心劇腎於辭章間陋之陋者也自是撫世酬物一出於正而異端無實之說了若不經意事父母輒盡其孝奉異母之兄甚於同母者凡事必咨稟而後行遇弟有恩及其早捐館舍諸孤貧喪不得入土府君泣曰兄弟同氣也死而不葬吾心其安乎即命堪

與家卜地而藏焉夫尤相敬如賓自委禽至髮白無反
目之失教諸子力田孝弟不許事紛華靡麗遂名堂曰
順德且賦詩以示意待族姻廬井曲盡人情不以貴富
貧賤而為薄厚䟽數春秋祭其先儀文並循家禮升降
跪拜如將見聞其容聲人取以為法治家甚嚴子孫朝
夕冠帶承候顏色拱聽訓飭不命之退不敢退也晚年
築室東園藝菊花數十本當秋高氣清金錢纍纍然布
柔條間府君熟玩不忍釋去或對之酣觴清詠終日且

謂人曰菊誠吾良友吾殆托之以逃名乎達忠介公兼
善時出鎮於台聞府君有賢行將剡薦於朝府君謝曰
仕將以得祿養親也親亡以仕何為哉達公亦不敢彊
未幾遭疾府君度不能起召子若孫訓之曰吾晝夜兢
兢業業以克至於今日非為仰不愧俯不作抑且可以
見祖宗於地下汝等守爾孝弟篤爾忠信蹈爾禮義厲
爾廉耻庶幾不陷於有過之域吾雖死將含笑入地矣
已而遂卒時至正乙未十月二十一日也享年六十又

九府君曾祖懋宋鄉貢進士祖智父元豪補武學生妣

應氏金氏府君金出也娶同縣呂氏先十三年卒子男

子二公立公成公成先四年卒子女子一適楊弘祖孫

男六木松棠棐棣楫木棐即來謂文者孫女一歸呂志

尹卒後當某年月日葬於縣東一里馬裊山霞鵬之原

禮也嗚呼士君子之立身也其功名烜赫於世則登名

於國史其次焉則書諸郡志又其次焉則藉薦紳之立

言者以傳及其久也未嘗不與史志相為頡頏有若府

君之行斥乎澆漓葆乎醇熙一本乎真誠而弗事乎詭
隨此所謂一鄉之善士非歟是宜揭之崇阡以為聳善
扶世之計而所愧者予非其人也雖然予久居禁林海
內名公卿及賢士大夫所銘者多矣鮮有徵文於十九
年之後者而木與槩有焉則其久不忘乎親可知矣予
雖欲辭之而烏乎辭之若木與槩者亦可謂之孝孫矣
乎是為表

祝母葉氏鵠門阡表

姑蔑祝君應昇謁瀟金陵脩列其先母之行丐瀟為表
揭墓上嗚呼瀟也安能表而母乎夫表者所以焯德著
美為之庸何傷而瀟以弗能者非過激也盖有所感也
私竊自念吾先妣之棄諸孤越十三春秋矣縣緯雖有
其石而至今無文方思俯伏薦紳先生之門以求發其
幽輝而一時故老凋落盡矣瞻望昊天盡然傷心嗚呼
瀟也安能表而母乎雖然應昇之請力矣瀟或遏而絕
之則應昇將有同瀟之感頗聞之君子不以病於已者

病夫人於是因應昇之言而經緯之應昇之言曰先母諱了心姓葉氏世為衢人年二十二來居先君之少房其事正室汪夫人寅畏謹敎有過無弗及焉自先君歿與汪夫人同帷帳者垂三十齡情意款洽無乖忤之色每子婦進飲食或一味之珍必叩之曰汪夫人已食乎子婦應曰然始敢下筯非惟事長之有禮也其加厲於應昇者惟恐弗率於理時立應昇於前而語之曰吾不暇汎引古今事以詔汝姑即汝家言之汝目擊焉或耳

聞焉效之宜若易易也爾祖南劔教授君與鄉先達徐公友善徐既卒二子析田不能平由爾祖片言而決各受田萬畝二子德爾祖之靖其爭也請以畝二千為壽爾祖力却之踰年二子強之益切乃納其間田五畝辭多而受少今人所難爾當效爾祖之介當爾祖之歿爾世父甫三歲爾父方在妊後三月始生爾祖母江夫人冰雪自守寡母孤子相依為命淒然於寒杼苦鐙之間卒能再植厥家爾當效爾祖母之勤爾父由儒補郡吏

從衢調婺台二州遷建平縣典史遇刑獄之有疑者必傳經典其無辜坐繫者必察其狀理而出之以故所至人咸稱其賢也爾當效爾父之仁爾祖若父其善行蓋不止是吾耄矣不能詳也以吾之所言則其所不言者宜以意逆之也初江夫人聘我以事爾父我至則江夫人歿久矣我不及侍養也所不深恨者幸而有爾也爾當聽吾言籍而佩之他日有所成立使人謂江夫人有孫是吾志也嗚呼應昇何從而能受先母之托乎先母

頗涉獵傳記每見書紙在地必掇拾付之水火雖入糞
溷中亦固取之人問其故則曰倉頡造書時鬼尚夜哭
可踐而蹂之耶性尤巧慧凡紉製縷結之事極其工緻
諸女多師之經其指授者皆合繩尺然鬢毛種種未嘗
少自暇逸所御衣衾或當漱澣必躬親作之子婦女隸
求執其勞弗從也生於某年月日卒於某年月日壽七
十二以某年月日葬於西安縣靖安鄉大鵬門山之原
男一即應昇孫三曰士成士同士寧先君諱化孫前若

千年卒其墓既別有誌惟先母之塋已久未有刻文吾子幸昇之非惟有以慰幽靈於泉壤抑將以昭示子孫使服膺慈訓於無窮也先是應昇為浦江校官濂獲與之游嘗為記其壽諼堂者堂蓋為母作也備聞其母賢甚因為表其墓曰詩之有無非無儀說者曰婦人無所專於家事有非非婦人也有善亦非婦人也斯言也豈曰婦人不宜有善哉以其行不出閨門謂雖有善人無從而知之耳世之婦女賢者非不眴然明也願求其故

皆其子孫有以揚之故令聞煒燁不隨時而泯沒也然則隧石之文其可不亟圖之乎嗚呼應昇能之而濂有弗能焉其可忤也已其重有所感也已

故孝友祝公榮甫墓表

濂嘗奉詔總修元史凡天下有關史事者下郡國長吏博加采輯悉上送官往往吏非知書者以致龐襍淆亂不足以取徵孝友之人動至數千皆溢浮辭而乖實行濂令史官高啓撰次成編而親為筆削之唯存一百六

人皆灼然可以勵世惇俗者而處之祝公榮亦其一焉
娶與處雖連壤不知公榮之詳後七年公榮之子崑持
所狀羣行求文表諸墓道蓋公榮之歿已十八年矣狀
之稱述皆傳中所略者遂次第而序之公榮諱大昌公
榮字也居處之麗水官橋里姓祝氏祝出軒轅氏之後
至周武王時封彭祖遠孫光為祝侯子孫為齊所并故
以祝為姓歷代多有顯人具載家牒可徵也五季初有
諱寔字茂之者自信安來為處州判官遂遷焉壽九十

二以歿塋宣慈杉坑塘之原寔生中奉大夫續續生朝
議大夫儒儒生承議承議生允懷允懷生況況生宋紹
聖進士建州司理叅軍奕奕生公冕公冕生份份生武
學教諭天祐天祐生潭州司戶叅軍詢詢生之琦之琦
生紹紹則公榮之父也公榮孝友出於天性其在父母
側容色穆穆以和父母意有所欲先候知之不待出言
而事已集一日不見心惶惶焉若亡重寶得一口味雖
在百里外必歸薦之然後敢食母病晝夜鍊藥奉渫糜

以進衣久不脫蟻蟲叢生其間已而疾勢革走謁於羣
神且泣且禱語不成聲見者為之揮涕及母歿擗踊無
筭屢至殯絕其於復襲揆綴歛殯奠祔之禮悉遵古制
而不墜流俗之陋煬人不戒火起竈突間烟燄漲天公
榮於急遽中力不能救乃伏棺而悲號且曰天乎吾母
在斯幸天有以祐之天苟不祐我將與母俱焚誓不獨
存也其火忽自滅州里嘆異曰昔蔡順伏母棺而火滅
不意今日於公榮見之公榮既葬母朝夕翹首如有望

而弗至既而曰是終無以解吾憂也乃命工搏土肖二
親像於堂朝夕事之如事生焉公榮敬兄公亮如其父
家政大小必關白而後行公亮出仕公榮不敢中席而
坐恒若公亮之臨乎上其弟公直亡公榮奔視遂頻仆
於地良久乃蘇抱弟屍而大呼曰吾弟去吾而何之乎
悲悼過甚髮為之早白撫弟遺孤逾於己所生公榮孳
孳以同憂為政請於公亮建家範數十則令子姓分任
諸事視其勤惰而懲勸之每旦序食堂上氣象雍肅若

不聞人聲三世之間愉愉如也或者欲問之說其分財
公榮勃然變色曰此言何為至於我哉必吾不睦於家
不敦友恭之道故爾昔張公藝尚九世義居況親昆弟
乎苟計利而害義犬彘當不食吾餘因撫膺長慟言者
赧然而退故處之人士言孝友者一則曰公榮二則曰
公榮至今無間言云公榮風岼偉特善談史上下二千
年治忽幾微而指諸掌聽者忘倦尊賢重傳未嘗有毫
毛褻慢意平心率物好惡無所偏徇而尤好施與故舊

貧窶者周之死而不能棺者給之或丁歲儉下粟估糶之青田盜阻行舟民不能鹽食公榮出所儲鹽惠宗族親婣以及於閭井人皆德之當元之季四方用兵藩閫大臣多鈎致豪傑而布衣之士有談笑取將帥者聞公榮之賢辟書交至公榮笑而辭江浙行中書左丞相方承制行事署為處州路儒學教授亦辭乃築室南野而隱居焉不料以至正二十年庚子正月一日卒壽五十又八二十一年辛丑某月日墓於武川飛鳳山下禮也

公榮凡三娶先配同縣王氏次東甌王氏次閩中陳氏

皆簪纓大族子男子三人曰山曰崑曰幽皆好學尚義

崑即來連銘者子女子三人常消王達其壻也一未行

嗚呼孝者百行之根抵萬事之綱紀也執一術而百善

至百邪去唯斯道則然所以化民成俗者汲汲焉是務

而莫敢忽也近代之制文臣自少卿監以上武臣自正

刺史以上實錄方為立傳而能行孝友之政者雖在韋

布中亦必登名與之齊行其治化之權衡於是亦可觀

矣有若公榮之行之美豈可使其泯泯無傳哉嗚呼古之人有云位登台輔也爵列公侯也祿積萬種也馬踰千乘也歿之日曾不得與斯人之徒並不朽無他以風教所關為甚重也濂雖不敏其於公榮之行一一銘之石以為世道之勸孰曰非宜銘曰

孝友之根實出隆衷金石堪貫神明可通古之君子資之出治因其秉彛牖民孔易雖在布衣彤筆登名其意斯何樹之風聲閭閻祝君愛親靡舍朝斯夕斯肯離膝

下親既云亡塗殯在庭臨風泣血哀不自勝煬人勿戒
火起曲突有烟勃起上不見日伏棺悲號誓與俱焚誰
謂天高邈若不聞若勢方升熾不可遏不待反風虐焰
隨滅家政之修法古名門毫髮敢私唯義之敦嚴布科
條各授以事一門雖雖罔有乖戾辟書交飛君笑而嘻
我有我政奚暇外馳古有篤行照耀方策以今較之孰
為優劣埃風渺瀰德化耨鋤況曰善事不忘厥初飛鳳
之山林木葱蒨勒文墓門用為世勸天兮蒼蒼地兮茫

茫高風與永百世流芳

故太和蕭府君墓表

大江之西蕭為著姓而居太和之後銜者為尤盛唐開元間有從浙水東來為縣遂家焉譜圖闕逸不知其名而相傳且二十九世矣自時厥後擢進士第於奉常者後先相望宋氏南渡有為國子祭酒諱某者實生秘書監清伯秘書生南甫某年進士進士生四子長宗聖次宗陽皆以儒學入仕宗聖則臨江府教授宗陽則太和

縣校官也次宗孟潛貢進士次則宗元府君然自秘書而下名皆忘今以其字書府君諱夢得元齋其自號也生四歲而孤鞠於母夫人倪氏年七歲夫人使之從師即知樂學九歲善屬文同肄業者皆畏而愛之已而與翰林待制楊君景行師事鄉先生達觀楊氏於是益潛心諸經而於易學尤精至元庚寅詔定江南版籍適部使者李公行縣李集多士於庭試以經義中者始得預士籍蠲其科繇府君遂升首選時倪夫人已老府君不

復有出仕意科目法行雖舊日同門之友多躋膺仕府
君澹然若無營或問之則曰吾母日薄西山吾尚欲遠
游乎郡二千石及縣大夫數欲剡薦之皆不聽尋與漕
貢君於縣西二十里創甘竹別業奉夫人居焉夫人性
好施遇內外族嫻之急者必思周之府君家雖貧能一
如夫人之志女弟及甥女未有所歸府君備貲裝配於
名族夫人悅而安之及夫人病府君不解衣者數月死
則廬墓左三年然後返遠近學者慕府君文行咸願執

經為弟子學成而去若同里楊升雲若永新吳從彥若
吉水周通若嘉禾俞鎮皆為名進士其黷黷於北方者
尤多不能悉舉也府君雖不及仕其仁民愛物之心旦
旦不忘縣之賦役無藝强有力者脫籍而使寡夫弱子
承焉府君毅然曰是奚可哉乃走白上官稽其物產而
甲乙之編為義役三年人以為允川梁有敗壞者勉有
力葺治之鄉鄰有訟者及相關者是非方糾紛能以片
言決之不幸以至正甲午八月十一日卒於家壽七十

又七以乙未十二月某日塋於家東某山之原娶邱氏
子男一人飛女一人歸廬陵易子韶孫男三人曰執曰
安曰鳳執鄉貢進士今選為國子錄孫女一人同里吳
所與其壻也魯孫男四人曰珠曰韶曰規曰忠府君所
著書有易學旁通若干卷燬于兵無復存者府君之塋
周通集羣行為狀進士顏成子據之撰銘納玄堂中禮
畧備矣執復來請曰願有以表諸墓道嗚呼爵位可致
也貨泉可有也聲問可長也唯世惇書詩不可必也蕭

氏自祭酒士傳經於家至於府君尤能繼其志而不墜其靜也于于其動也徐徐不銜鬻而進趨每深藏而自腴殘膏賸馥霑丐於人者亦足以獲多士之譽斯不亦君子之儒也歟是為表

先母夫人陳氏墓表

先母陳夫人諱賢時金華潛溪人大父諱靚惠父諱道閑母金氏諱信夫人年二十來孀蓉峰處士處士大雅君子生平不識偽言偽行與夫人偕如鼓琴瑟生二子

淵濂一女嬖以至正丙戌正月十七日卒壽六十有三
其年三月五日即窆於白石山在潛溪西十里夫人淑
茂柔明及行尤有聞於六親相處士建家脩極勞動晝
趨事夜紉綴諸子衣大暑夕蚊蚋翳撲乃燒燈坐帳中
久之帳色如潑墨處士嘗謂夫人曰吾不解市美田宅
遺兒教之通一經足矣夫人深然之至賣簪珥使游學
遠方夫人早喪母事父甚孝雖在夫家懸懸慕之如饑
但得食頗美亟遣人遺之不遺不敢先食夫人春秋未

高見淵以醫學鳴用薦者為義烏教諭濂亦自布衣召
入史館娶適儒士賈明善皆有孫矣居亡何不幸歿世
濂追痛罔極魄隕心喪深懼懿德不顯於後忍死而書
之曰潛溪有賢母焉厥質郁如厥行潔如厥聲蔚如白
石之山發徵畜腴其體魄之所寧歟是為表

辭

凡二章

故丹谿先生朱公石表辭

丹谿先生既卒宗屬失其所倚藉井邑失其所依憑嗜

學之士失其所承事莫不旁皇遙慕至於灑涕瀟聞之
中心尤摧咽不自勝蓋自加布于首輒相親於几杖間
訂義質疑而求古人精神心術之所寓先生不以瀟為
不肖以忘年交遇之必極言而無所隱故知先生之深
者無踰於瀟也方欲聚厥事行為書以傳來世而先生
之子玉汝從子嗣汜忽躋瀟門以先生從弟無忌所為
狀請為表以勒諸墓上瀟何敢辭先生諱震亨字彥修
姓朱氏其先出於漢槐里令雲之後居平陵至晉永興

中臨海太守汎始遷今婺之義烏子孫蟬聯多發聞於
世郡志家乘載之為詳當宋之季有東堂府君者諱良
祐懿然君子人也蓋以六經為教以宏其宗府君生某
某生迪功郎桂迪功生鄉貢進士環先生之大父也父
諱元母某氏先生受資爽朗讀書即了大義為聲律之
賦刻燭而成長老咸器之已而棄去尚俠氣不肯出人
下鄉之右族或陵之必風怒電激求直于有司上下搖
手相戒莫或輕犯時鄉先生文懿許公講道東陽入華

山中公上承考亭朱子四傳之學授受分明契證真切
擔登而從之者亡慮數百人先生歎曰丈夫所學不務
聞道而唯俠是尚不亦惑乎廼振衣往事焉先生之年
蓋已三十六矣公為開明天命人心之秘內聖外王之
微先生聞之自悔昔之沉冥顛隳汗下如雨由是日有
所悟心局融廓體膚如覺增長每宵挾冊坐至四鼓潛
驗默察必欲見諸實踐抑其疎豪歸於粹夷理欲之關
誠偽之限嚴辨確守不以纖毫苟且自恕如是者數年

而其學堅定矣歲當賓興先生應當大比幸沾一命以
驗其所施再往再不利復嘆曰不仕固無義然得失則
有命焉苟推一家之政以達於鄉黨州閭寧非仕乎先
是府君置祭田三十餘畝合為一區嗣人遍司穡事以
陳時薦然有恒祭而無恒所先生廼即適意亭遺址建
祠堂若干楹以奉先世神主歲時行事復考朱子家禮
而損益其儀文少長咸在執事有恪深衣大帶以序就
列宴私洽比不愆於禮適意亭者府君所造以延徐文

清公之地先生弗忍其廢改創祠堂之南俾諸子姓肄習其中包銀之令下州縣承之急如星火一里之間不下數十姓民莫敢與辨先生所居里僅上富氓二人郡守召先生自臨之曰此非常法君不愛頭乎先生笑曰守為官頭固當惜民不愛也此害將毒子孫必欲多及民願倍輸吾產當之守雖怒竟不能屈縣有暴丞好誂瀆鬼神欲修岱宗祠以徼福懼先生莫已與以言嘗之曰人之死生獄神實司之欲治其官孰敢干令先生曰

吾受命于天何庸媚土偶為生死計耶且獄神無知則已使其有知當此儉歲民食糠覈不飽能振吾民者然後降之福耳卒罷其事賦役無藝胥吏高下其手以為民奸先生集同里之人謂曰有田則科徭隨之君等入胥史餌而互相顧非策之上也宜相率以義絜其力之朶贏而敷之衆翕然從每官書下相依如父子議事必先集若苛歛之至先生即以身前辭氣懇款上官多聽為之損裁縣大夫勸耕于鄉將有要於民先生懼其臨

境邪幅靡屨往迎于道左大夫驚曰先生何事廼爾邪
先生曰民有役于官禮固應爾大夫曰勸耕善乎先生
曰私田不煩官勸第公田生青芻耳是時圭田賦重種
戶多逃亡故先生以此為風大夫一笑而去鄉有蜀墅
塘周圍凡三千六百步溉田至六千畝而羸堤壞而水
竭數以旱告先生倡民興築置坊庸鑿為三竇時其淺
深而舒洩之民食其利後十年山水暴至堤又壞先生
命再從子漳力任其事以嗣其成縣令長或問決獄得

失先生必盡心為之開導東陽郭氏父子三人虐毆小民幾斃又貫鉞鰥腹逼使吞之事移義烏鞠問當其子父皆死先生曰原其故殺之情亦一人可償爾二子從父之令宜從末減若皆殺之無乃已重乎事上從先生議張甲行小徑中適李乙荷任器來幾中甲目甲怒拳其耳而死甲乙皆貧人甲又有九十之親先生曰貫甲罪則廢法徇法甲必瘦死親無以養亦死乙屍暴於道孰為藏之不若使竟其塋葬且慰其親徐來歸獄服中

刑耳或曰甲或逃奈何先生曰若以誠待之必不爾也
縣如先生言後會赦免細民有斬先生丘木者先生訊
之民弗服先生聞于縣將逮之人交讓民曰汝奈何犯
仁人邪民曰計將安出人曰先生長者也急昇木還之
當爾貸民從之先生果實而不問先生客吳妙湛院尼
刻木作人形以為厭蠱館客陳庚得之欲發其事尼懼
甚先生知之以計給陳出碎其木刻陳歸怒且詈先生
徐曰君乃士人獲此聲於吳楚間甚非君利儻乏金吾

財可通用勿憂也尼後輦金帛為謝先生吻而去方獄重臣及廉訪使者聞先生名無不願見既見無不欲交章薦之先生皆力辭唯關

浙東尤敬先生以尊客

禮禮之衆或不樂競短其行於公公笑曰朱聘君盛舉諸公之長而諸公顧反短之何其量之懸隔邪皆慙不能退初先生壯齡時以母夫人病脾頗習醫後益研礪之且曰吾既窮而在下澤不能至遠其可遠者非醫將

安務乎時方盛行陳師文裴宗元所定大觀二百九十
七方先生獨疑之曰用藥如持衡隨物重輕而為前却
古方新證安能相值乎於是尋師而訂其說渡濤江走
吳又走宛陵走建業皆不能得復回武林有以羅司徒
知悌為告者知悌字子敬宋寶祐中寺人精於醫得金
士劉完素之學而旁參於李果張從正二家然性倨甚
先生謁焉十往返不能通先生志益堅日拱立於其門
大風雨不易或告羅曰此朱彥修也君居江南而失此

士人將議君後矣羅遽修容見之一見如故交為言學
醫之要必本於素問難經而濕熱相火為病最多人罕
有知其秘者蕪之長沙之書詳於外感東垣之書詳於
內傷必兩盡之治疾方無所憾區區陳裴之學泥之且
殺人先生聞之夙疑為之釋然學成而歸鄉之諸醫始
皆大驚中而笑且排卒乃大服相推尊願為弟子四方
以疾迎候者無虛日先生無不即往雖雨雪載途亦不
為止僕夫告痛先生諭之曰疾者度刻如歲而欲自逸

耶窶人求藥無不與不求其償其困阨無告者不待其
招注藥往起之雖百里之遠弗憚也江浙省臣往討閩
寇深入瘴地遂以病還錢塘將北歸先生脉之曰二十
日死使道經三衢時召吾可使還燕然亦不能生之也
如期卒於姑蘇驛權貴人以微疾來召危坐中庭列三
品儀衛於左右先生脉已不言而出或追問之先生曰
三月後當為鬼猶有驕氣耶及死其家神先生之醫載
粟為壽先生辭之一少年病熱兩額火赤不能自禁躁

走於庭將蹈河先生曰此陰證也製附子湯飲之衆為之吐舌飲已其疾如失先生治療其神中若此甚多門人類證有書茲不詳載先生孤高如鶴挺然不羣雙目有大小輪日出明雖毅然之色不可凌犯而清明坦夷不事表襮精神充滿接物和粹人皆樂親炙之語言有精魄金鏘鏗鏗使人側耳聳聽有蹶然興起之意而於天人感應殃慶類至之說尤竭力戒厲反覆不厭故其教人也人既易知昏明強弱皆獲其心老者則愛慈祥

幼者則樂恭順莫不皆知忠信之為美固未能一變至
道去泰去甚有足觀者或有小過深掩密覆唯恐先生
之知凡先生杖履所臨人隨而化浦陽鄭大猷十世同
居先生為之喜動顏面其家所講冠昏喪祭之禮每咨
於先生而後定蓋先生之學稽諸載籍壹以躬行為本
以一心同天地之大以耳目為禮樂之原積養之久內
外一致夜寐即平晝之為暗室即康衢之見汲汲孜孜
毫而彌篤每見誇多鬪靡之士輒語之曰聖賢一言終

身行之弗盡奚以多為至於拈英摘豔之辭尤不樂顧
且以吾道蠹賊目之及自為文率以理為宗非有關於
網常治化不輕出也居室垣墉敦尚儉朴服御唯大布
寬衣僅取蔽體藜羹糗飯安之如八珍或在豪大姓家
當其肆筵設席水陸之羞交錯於前先生正襟默坐未
嘗下箸其清修苦節能為人之所不能為而於世上所
悅者澹然無所嗜惟欲聞人之善如恐失之隨聞隨錄
用為世勸遇有不順軌則者必誨其改事有難處者又

導之以其方晚年識見尤卓嘗自括蒼還道過永康謂
人曰青田之民嚚悍值此法弛令乖之時必依險阻嘯
聚為亂已而果然又嘗告親友曰吾足跡所及廣矣風
俗澆漓甚垂髫之童亦能操狡謀罔上天怒已極必假
手殲之盡力善以延其胤乎時方承平聞者咸笑先生
之迂言未幾天下人亂空村無烟火動百餘里先生所
著書有宋論一卷格致餘論若干卷局方發揮若干卷
傷寒論辨若干卷外科精要發揮若干卷本草衍義補

遺若干卷風水問答若干卷凡七種微文奧義多發前
人之所未發先生嘗曰義禮精微禮樂制度吾門師友
論著已悉吾可以無言矣故其所述獨志於醫為多先
生生於至元辛巳十一月二十八日卒于至正戊戌六
月二十四日瀕卒無他言獨呼嗣汜謂曰醫學亦難矣
汝謹識之言訖端坐而逝享年七十有八娶戚氏道一
書院山長象祖之女先三十五年卒子男二嗣衍王汝
嗣衍亦先三年卒女四適傅似翁蔣長源呂文忠張思

忠孫男一文裾女二一適丁榆一尚幼其年十一月日
始塋先生于某山之原卒後之五月也先生所居曰丹
溪學者尊之而不敢字故因其地稱之曰丹溪先生云
夫自學術不明于天下凡聖賢防範人心維持世道之
書往往割裂攙拾組織成章流為譁世取寵之具間有
注意遺經似若可尚又膠於訓詁之間異同紛拏有如
聚訟其視身心皆藐然若不相關此其知識反出於不
學庸人之下於戲秦漢以來則或然矣然而靈豕不鳴

孽狐之妖弗息黃鍾不奏瓦缶之音日甚天開文運瀛
洛奮興遠明九聖之緒流者遏而止之膠者釋而通之
一期闡廓其昏翳挽回其精明而後已至其相傳唯考
亭集厥大成而考亭之傳又唯金華之四賢續其世肩
之正如印印泥不差毫末此所以輝連景接而芳猷允
著也先生少負任俠之氣不少撓屈及聞道德性命之
說遽變之而為剛毅所以局量宏而任載重寤寐先哲
唯日不足民吾同胞之念須臾莫忘雖其力或弗支苟

遇惠利少足以濡物必委蛇周旋求盡其心應接之際
又因人心感發之機而施仁義之訓觸類而長開物成
化所謂風雨霜露無非君子之教者要亦不可誣也致
思於醫亦能搜隱挾祕倡明南方之絕學嬰疾之家倚
以為命先生一布衣耳其澤物有如此者使其得位于
朝以行其道則夫明効大驗又將何如哉嗚呼先生已
矣其山峙淵澄之色井潔石貞之操與其不可傳者弗
能即矣徒因其遺行而誦言之見聞不博惡能得十一

於千百之間哉雖然舍是又無足以求先生者敢撫狀之槩叙而為之銘曰

濂洛有作性學復明考亭承之集厥大成化覃荆揚以
及閩粵時雨方行區萌畢達世胄之正實歸金華縣延
四葉益熒其葩辟諸上尊寘彼達路隨其志分不爽其
度有美君子欲振其奇血氣方剛疇能侮予七尺之軀
忍令顛越壯齡已踰亟更其轍更之伊何我笈有書負
而東遊以祛所疑非刻非厲曷圖曷究豈止惜陰夜亦

為畫昔離其量今廓其矇始知人心與宇宙同出將用
世時有不利乎惠家邦庶亨厥志勤我祠事以帥其宗
況有書詩以陶以礪以暢其施期壽夫物苟躬可捐我
豈遑恤仁義之言繩繩勿休昭朗道真釋除欲仇上帝
有赫日注吾目天人之交間不容粟聽者聳然如聞臣
鑄有聲鏗鉤無耳不聰旁溢于賢亦紹絕躅開闡玄微
功利尤博歛其豪英變為毅宏所以百為度越于人咕
咕世儒出入口耳競藻闢華析門殊軌以經為戲此孰

甚焉不有躬行其失曷鑄世塗方冥正資揚燎夢夢者
天使埋其耀精神上征定為長庚與造化遊白光煒煒
表德幽墟遵古之義僉曰允哉是詞無愧

諸暨方孝婦石表辭

嗚呼是惟孝婦方氏之墓夫孝未易稱余獨歸之孝婦
而不斬者將以媿為人婦之不孝者也孝婦姓方氏諱
迎越之暨陽人生二十七歲歸同里楊君敬敬有母何
氏孝婦左右就養惟恐違其志何病腑道溢不能親御

偃溷孝婦浸之湯盆中以指探出之積歲之久手文皆龜裂而孝婦未嘗有倦色昔人有為親浣廁踰者史臣尚以為難載之於策考孝婦之事尤人所難者耶人之所難者且若是則孝婦其他之行弗問而可知也嗚呼是尚不得為孝婦矣乎使如此而不得為孝則夫勃谿而不恭者乃足為孝乎予自成童時讀劉向所傳古孝婦事以為斯世何為無此人心雖未敢必其無然歷三十餘年卒不能一逢嗚呼余豈意今於暨陽乃見之也

暨陽距予金華僅二百里予昔嘗兩至其處而不知有
孝婦至今始得知之嗚呼予又意世之如孝婦者夫豈
少哉特以不遇于君子故湮滅草萊而人弗聞之耳其
弗聞者予固無如之何其幸而得聞者可不大書揭之
崇阡以媿人婦之不孝者耶非惟媿人婦也抑將媿人
子也孝婦性儉慈頗知讀書嘗粥田教子父德在母張
皆宦族年六十一生二子恒慧其卒以至正二年九月
五日其葬於馬鞍山以三年十二月二十二日云

誌凡二章

故成穆貴妃壙誌

成穆貴妃孫氏諱某其先世居陳州父和卿仕元朝因家江南毗陵母晁氏妃稟性賢淑聰慧過人父母既亡長兄瑛治家事值元末天下大亂妃年十三隨次兄範避兵揚州遇青軍陷城一時離散範不知所在元帥馬世熊妻遂育妃為義女年十八未聘上聞其有容德詔納宮中及至言行皆有禮法如古賢女嘗請於上訪求

模得相見上即位冊為貴妃位居衆妃之首妃益小心
恭謹上甚至有儆戒相成之助佐皇后以理內治宮壺
肅雍上下咸無怨者侍上十有五年生四女其第二女
早卒洪武七年秋九月癸未妃得疾至庚寅薨年三十
有二上為之感悼詔謚成穆復緣人情定議命東宮親
王持服一暮勅有司營塋具甚厚念其無子賜田租三
百石令模供歲時祭祀之費卜日未得吉停柩宮中者
兼旬至十月己酉始權厝京城朝陽門外褚岡之原禮

也塗殯有期謹奉勅書其卒塋歲月納諸壙中嗚呼哀哉

故檢校孔君權厝誌

故奉議大夫湖廣等處行中書省檢校官孔公諱瀛字世表宣聖五十三世孫初家曲阜四十七世曰傳始遷衢故事孔子之後得補文學掾公年二十有司以名上署昌國州學正教授岳州湖北廉訪使者辟為書吏除江浙等處儒學副提舉階將仕郎間乘馬出道逢宣政

使騶從甚都公直前不避使使人讓之公曰我真聖人之裔官乃偽浮屠豈應相避耶政成以入廣例陞尹海陽政浣江二邑民安之湖南亂公供億軍中朝廷錄其勞授以今官尋以使事入蜀議連兵殄寇至蜀蜀亂公間關巴峽間久之復經雲夢汎洞庭回鄂鄂又亂妻張子思樵溺死僅勝散盡唯繼室高昌氏及爨下兩丁嫗存公度鄂不可居航彭蠡直趨豫章尋自豫章下九江九江又亂百具咸沒公被垢衣偃偃走持孔氏南北譜

唯恐失之見者或曰迂人哉或曰此知本者也公一弗
顧轉徙來金陵依富川族孫克仁居會高昌氏生子頗
自慰曰得是亦足矣越三月子死竈嫗亦亡公旦暮淚
不收衢抵金陵路餘一千耳思還衢未行適衢人至言
其家廟蕪不治田若廬為戍兵所據益鬱鬱弗能解血
出陰中藥之劇或具牲幣請崇鍾山神公罵曰死生命
爾神安能制哉急去毋汙我迨疾革召克仁謂曰克仁
克仁吾出千萬死至此意能歸正丘首豈知死於道路

以鬼事累汝語已目視霄漢者久之克仁亦淒然不能對夜漏下二十刻卒時壬寅五月二十有一日壽六十三公生紈綺家遇風日佳時必張樂設燕為樂趙歌燕舞交錯乎後先公頽然自放其中適甚末路顛連子子作寒窶士然生平俠氣時時見眉宇間識者憐之性頗嚴介子姓侍側終日不交一語多憚不敢近及是旅死無為主後者唯高昌氏擁鼻號聲不忍聞克仁雖貧力為具棺歛擇不食之地於石子岡距金陵城南三百步

以卒後三日昇公柩權厝焉濂與公皆浙水東人故數造公公喜執濂臂曰吾見子殆欲忘食也未卒十五日與會稽梁君元亨會飲克仁家公居筵端劇談至日西下飲酒雖稍減精神浮動猶津津然不意公之遽亡也嗚呼人孰無患難未有甚如公者妻子死欲盡流挫困踣無所不極似可已矣若俾令終于鄉葬骨從先人復何害亦竟實魄於北其甚可哀也夫公生神明之胄厯仕四十年又得中壽以死死且得禮葬視血染刀劒身

膏草莽者又何如在公可以無憾雖然後嗣弗續古人
所深悲公不幸蹈之人歟天也使公有知目決不瞑於
泉下奈之何不衰乎濂聞公死哭之慟克仁請志其事
淚以書其略若公羣行之詳則有俟於撰銘文者



文憲集卷二十四



總校官庶吉士臣侍 朝

校對官中書臣王鍾泰

膳銀監生臣秦朴